

13. gr.

Stjórnin fastræður hljóðfæraleikara, að fengnum tillögum framkvæmdastjóra, í minnst 65 stöðugildi. Heimilt er að ráða í hlutastörf. Aðra hljóðfæraleikara ræður stjórnin á sama hátt eftir því sem viðfangsefni krefjast, enda hafi viðfangsefnið verið samþykkt í fjárhagsáætlun. Um ráðningu hljómsveitarmanna og framkvæmd hæfnisprófa skal fara eftir reglum sem stjórn hljómsveitarinnar setur.

Um launakjör og vinnutíma starfsmanna hljómsveitarinnar fer eftir kjarasamningum þeirra við fjármálaráðherra.

14. gr.

Við verkefnaval Sinfóníuhljómsveitar Íslands skal stjórn hennar njóta aðstoðar verkefnavalsnefndar sem skipuð er til fjögurra ára um leið og stjórn hljómsveitarinnar.

Nefndin skilar tillögum og áætlunum um verkefni hljómsveitarinnar fyrir hvert starfsár, svo og tillögum um stjórnendur, einleikara og söngvara, eigi síðar en 1. nóvember ár hvert. Framkvæmdastjóri og aðalhljómsveitarstjóri gera starfsáætlun á grundvelli tillagna verkefnavalsnefndar og í samráði við hana og leggja fram ásamt kostnaðaráætlun fyrir stjórnina eigi síðar en 1. febrúar. Fyrir 1. mars skulu liggja fyrir drög að verkefnavali þess starfsárs sem hefst á öðru eftirfarandi hausti, nægilega ítarleg til að leggja megi þau til grundvallar fjárlagatillögum fyrir næsta reikningsár (almanaksár).

15. gr.

Heimilt er að ráða tónskáld til starfa í þágu hljómsveitarinnar í takmarkaðan tíma, eigi skemur en þrjú mánuði og eigi lengur en eitt ár í senn, eftir ákvörðun stjórnarinnar. Auglýsa skal eftir umsóknum um slíka ráðningu, og skal hún bundin ákveðnu verki sem unnið skal á ráðningartímanum. Til þessa má verja sem svarar tólf mánaðarlaunum á ári hverju.

16. gr.

Reglugerð þessi er sett samkvæmt 11. gr. laga um Sinfóníuhljómsveit Íslands nr. 36/1982 og öðlast þegar gildi. Jafnframt er felld úr gildi reglugerð nr. 203/1987 um Sinfóníuhljómsveit Íslands.

Menntamálaráðuneytið, 18. apríl 1991.

Svavar Gestsson.

Árni Gunnarsson.

REGLUGERÐ

um menntun, réttindi og skyldur slökkviliðsmanna.

1. gr.

Reglugerð þessi tekur til:

1. Þeirra sem gegna slökkvistarfi eða starfa við brunavarnir að aðalstarfi.
2. Þeirra sem gegna slökkvistarfi eða starfa við brunavarnir samkvæmt 7. gr. laga nr. 74/1982, um brunavarnir og brunamál.

2. gr.

Umsækjendur um störf slökkviliðsmanna, sbr. 1. gr., skulu fullnægja eftirtöldum skilyrðum:

1. Hafa iðnmenntun sem nýtist í starfi slökkviliðsmanna eða sambærilega menntun og reynslu.
2. Vera á aldrinum 20-28 ára, reglusamir og háttvísir.
3. Hafa góða líkamsburði, gott andlegt og líkamlegt heilbrigði, hafa góða sjón og heyrn og rétta litaskynjun. Vera ekki haldnir lofthæðslu eða innilokunarkennd.
4. Hafa meirapróf bifreiðastjóra.

Víkja má frá ofangreindum skilyrðum að hluta til vegna þeirra sem gegna slökkvistarfi eða starfa við brunavarnir, sbr. 2. tölul. 1. gr.

Endurráðning slökkviliðsmanna, sbr. 1. tölul. 1. gr., til almennra slökkvistarfa er heimil allt að fimm árum eftir að þeir hverfa frá starfi. Að öðru leyti miðast endurráðning við það að slökkviliðsmenn standist þær kröfur sem fram koma í 2. og 3. gr. reglugerðar þessarar.

3. gr.

Menntun og starfsþjálfun slökkviliðsmanna skal vera:

1. Grunnám.
2. Fullnaðarnám.

Í grunnnámi skal eftirfarandi tekið fyrir:

Almenn slökkvitækni, akstur slökkvibifreiða og meðferð annars slökkvibúnaðar, björgunarstörf, mengunarvarnir, meðferð á eitruðum og hættulegum efnum, reykköfun og aðstoð við sjúka og slasaða.

Í fullnaðarnámi skal eftirfarandi tekið fyrir:

Þeir þættir, sem um er getið í grunnnámi, skulu kenndir þannig að slökkviliðsmenn nái fullnaðarþekkingu í þeim. Þá skal kennsla í ýmsum sérhæfðum störfum fara þar fram, s.s. í lögum og reglugerðum um brunavarnir og brunamál, þjálfun í lestri teikninga og meðferð körfubíls.

Slökkviliðsmenn, sbr. 1. tölul. 1. gr., skulu hafa lokið menntun og starfsþjálfun samkvæmt 1. tölul. þessarar greinar innan árs frá því að þeir hefja störf og samkvæmt 2. tölul. eigi síðar en fjórum árum frá því þeir hefja störf.

Þeir sem gegna slökkvistarfi, sbr. 2. tölul. 1. gr., skulu, eftir því sem við verður komið, hafa lokið menntun og starfsþjálfun samkvæmt 1. tölul. þessarar greinar innan eins árs frá því að þeir eru skipaðir til starfa.

Slökkviliðsmönnum skal gefinn kostur á að sækja um framhaldsnám enda hafi þeir lokið námi samkvæmt 1. málsgrein þessarar greinar.

Í framhaldsnámi skal eftirfarandi tekið fyrir:

Þeir þættir er lúta að slökkvistarfi, stjórnun, eldvarnareftirliti, brunarannsóknnum o.fl. Nám skal metið til starfsréttinda eftir því sem við á.

4. gr.

Félagsmálaráðuneytið skal, að fengnum tillögum Brunamálastofnunar ríkisins og að höfðu samráði við Samband íslenskra sveitarfélaga og Landssamband slökkviliðsmanna, setja nánari reglur um nám slökkviliðsmanna, nauðsynlega undirbúningsmenntun þeirra og hvernig kennslu skuli hagað.

5. gr.

Slökkviliðsmönnum ber að viðhalda þekkingu sinni og tileinka sér nýjungar varðandi starfið, m.a. með námskeiðum og verklegri þjálfun, þar sem henni verður við komið.

6. gr.

Slökkviliðsmenn, sbr. 1. tölul. 1. gr., skulu að jafnaði ganga í einkennisfatnaði við störf sín. Einnig skulu þeir fá nauðsynlegan hlífðarfatnað gegn kulda og vosbúð. Sama skal gilda um slökkviliðsstjóra, varaslökkviliðsstjóra og eldvarnareftirlitsmenn, sbr. 2. tölul. 1. gr.

Brunamálastofnun ríkisins skal setja nánari reglur um hlífðarfatnað. Sveitarstjórn skal setja nánari reglur um einkennisfatnað.

7. gr.

Slökkviliðsmenn skulu njóta sömu verndar og aðstöðu og aðrir þeir er gegna borgaralegri skyldu og skulu þeir tryggðir í starfi í samræmi við áhættu starfsins.

Ekki má á nokkurn hátt tálma því að slökkviliðsmenn geti sinnt starfi sínu.

8. gr.

Við lífshættuleg skilyrði skal slökkviliðsmaður ávallt gæta þess að stofna hvorki eigin lífi né annarra berlega í tvísýnu.

9. gr.

Slökkviliðsmönnum er skylt að gæta þagmælsku um atriði, sem þeir fá vitneskju um í starfi sínu og leynt skulu fara samkvæmt lögum og edli máls. Þagnarskylda helst þó þeir láti af störfum.

10. gr.

Um réttindi og skyldur slökkviliðsmanna fer að öðru leyti eftir II. kafla laga nr. 74/1982, um brunavarnir og brunamál, og samþykktum um slökkvilið á hverjum stað, eftir því sem við á. Leita skal umsagnar Lands sambands slökkviliðsmanna um samþykktir er geta varðað hagsmuni slökkviliðsmanna.

11. gr.

Um viðurlög vegna brota á reglugerð þessari fer eftir lögum nr. 74/1982, um brunavarnir og brunamál, og eftir því sem við á samkvæmt lögum nr. 38/1954, um réttindi og skyldur opinberra starfsmanna.

12. gr.

Reglugerð þessi, sem sett er samkvæmt e. lið 1. mgr. 3. gr. laga nr. 74/1982 um brunavarnir og brunamál, skal þegar öðlast gildi.

Félagsmálaráðuneytið, 19. apríl 1991.

Jóhanna Sigurðardóttir.

Þórhildur Línadal.

REGLUGERÐ

um Mengunarvarnarsjóð.

1. gr.

Sjóðurinn heitir Mengunarvarnarsjóður.

2. gr.

Sjóðurinn er stofnaður í samræmi við ákvæði 32. gr. laga nr. 32, 5. maí 1986 um varnir gegn mengun sjávar.

3. gr.

Tilgangur sjóðsins er að stuðla að fræðslu og annarri fyrirbyggjandi starfsemi til varnar mengun frá olfu, grút eða annars konar mengun sjávar, einkum á hafnarsvæðum.